



praeses commissionis de Ecclesiis Orientalibus, decretum *de Ecclesiae unitate*, die 26 novembris, proposuerat.

Hora 12,15 reposito S. Evangelii codice, praeses preces *Angelus... Agimus...* recitavit, et secretarius generalis intimavit proximam congregationem generalem die 1 decembris habendam.

XXXI

Congregatio generalis tricesima prima habita est sabbato, die 1 decembris, hora 9 matutina. Interfuerunt 2115 Patres, nempe 67 cardinales, 8 patriarchae, 9 primates, 373 archiepiscopi, 1555 episcopi, 10 abbates nullius, 11 praelati nullius, 82 superiores generales.

Missa de B. M. V. celebrata est ritu romano a P. D. Francisco Grimshaw, arch. Birminghamiensi. Chorus Cappellae Sixtinae cantus executus est: *Oremus pro Pontifice nostro, O memoriale, Iesu quem velatum, Panis angelicus.*

Post Missam P. D. Antonius Plaza, arch. Platensis, S. Evangelii codicem super paratum thronum statuit, dum Patres *Christus vincit* cum Ps. 116 cantant.

Intimatione facta: *Exeant omnes*, card. Ioseph Frings, arch. Coloniensis, precem *Adsumus...* recitavit.

Dein secretarius generalis ex ambone, proclamato nomine praesidis congregationis, communicavit in melius versam esse valetudinem Summi Pontificis, qui Patribus salutem plurimam et benedictionem paternam largiebatur. Omnes Patres plauserunt.

Tunc ex parte praefecti Congregationis caeremonialis cardinalibus notum fecit a die sequenti usque ad diem 7 decembris vestes laneas violacei coloris induendas esse.

Insuper legit propositionem, suffragationi submittendam, de unico documento conficiendo ex decretis *de Ecclesiae unitate* et *de Oecumenismo* una cum cap. 11 *de Ecclesia*.

Item annuntiavit alias emendationes circa schema *de sacra Liturgia* distributum iri, proxima feria II suffragationi submittendas, et communicavit exitum suffragationum super emendationes 6-9 ad cap. I schematis *de sacra Liturgia*. Omnes emendationes propositae approbatae sunt.

Tandem legit nomina Patrum, qui circa schema *de Ecclesia* loqui postulaverant.

Card. Ottaviani, praeses commissionis de doctrina fidei et morum, schema *de Ecclesia* proposuit, quod P. D. Franciscus Franić, ep. Spalantensis et Macarscensis illustravit.



Dein ex ordine ad loquendum a praeside vocati sunt: cardd. Achilles Liénart, ep. Insulensis, Ernestus Ruffini, arch. Panormitanus, Ioseph Bueno y Monreal, arch. Hispalensis, Franciscus König, arch. Vindobonensis, Bernardus Alfrink, arch. Ultraiectensis, Ioseph Ritter, arch. S. Ludovici; Lucianus Bernacki, ep. tit. Melensis, aux. Gnesnensis.

Hora 11,05 secretarius generalis, de mandato praesidis, significavit exitum suffragationis super propositionem circa decretum *de Ecclesiae unitate*. Propositio approbata est.

Dein prosecuta est disceptatio circa schema *de Ecclesia* et ex ordine locuti sunt Aemilius De Smedt, ep. Brugensis, Marcellus Lefebvre, arch. tit. Synnadensis, Arturus Elchinger, ep. tit. Antandrinus, coad. c.i.s. Argentoratensis, Ioseph D'Avack, arch. Camerinensis, Antonius Pawłowski, ep. Vladislaviensis, Ioannes Van Cauwelaert, ep. Inongoënsis, Aloisius Carli, ep. Signinus.

Durante congregatione Patribus distributus est fasciculus typis impressus, continens emendationes ad cap. 1, nn. 10-15, schematis *de sacra Liturgia*, et de eis relationem.

Hora 12,15 reposito S. Evangelii codice, praeses *Angelus... Agimus...* recitavit, et secretarius generalis intimavit proximam congregationem generalem die 3 decembris habendam.

XXXII

Congregatio generalis tricesima secunda habita est feria II, die 3 decembris, hora 9 matutina. Interfuerunt 2116 Patres, nempe 71 cardinales, 7 patriarchae, 9 primates, 369 archiepiscopi, 1554 episcopi, 10 abbates nullius, 10 praelati nullius, 86 superiores generales.

Missa celebrata est ritu Syro-Malabarico a P. D. Ioseph Parecattil, arch. Ernakulamensi. Alumni Collegii Urbani de Propaganda Fide exsecuti sunt cantus. Antea Patribus distributum fuerat opusculum typis impressum: *Ordo Missae Ecclesiae Malabarensis*.

Post Missam P. D. Georgius Alapatt, ep. Trichuriensis, S. Evangelii codicem super paratum thronum statuit.

Intimatione facta: *Exeant omnes*, card. Ernestus Ruffini, arch. Panormitanus, primi praesidis munere fungens, precem *Adsumus...* recitavit.

Dein secretarius generalis, proclamato nomine praesidis congregationis, annuntiavit suffragationem faciendam de emendationibus ad schema *de sacra Liturgia*, cap. 1, nn. 10-15, et legit nomina Patrum, qui loqui petierant circa schema *de Ecclesia* in genere.